



耳溪集三

詩

共二十二

~16
2330
3



和
號 2330
卷 21-3

耳溪集卷六目



詩

燕雲紀行

拜表出郊 二首

自坡州向松京

花石亭敬次正使鄭公 存謙韻

松京懷古

善竹橋

到青石嶺入海西界

發金陵向龍泉

王沂公集 卷之二
白龍泉抵洞仙關

冒雨踰洞仙嶺入黃岡

渡涇江登練光亭

西京懷古

箕子墓

百祥樓觀劔舞

渡薩水有感

倚劔亭與書狀共飲

入灣府

留題來宣閣

奉和正使韻

至日行禮館所述懷呈上价

渡江

露宿九連城

過松鶻山

宿葱秀山下

入柵門 二首

鳳凰城

宿通遠堡向連山關

青石嶺志感

過石門嶺入遼野

自冷井向遼東

太子河

詠荆軻

觀白塔向瀋陽

發瀋陽過磨刀橋

自黃旗堡夜抵白旗堡

一板門望巫閭

北鎮廟

十三山

松山堡

寧遠城憶袁巡撫

祖大壽牌樓

過東關驛向中後所始出遼野

遼俗四十韻

山海關八詠

射虎石

高麗堡

薊門烟樹

薊州途中

宿燕郊

路傍乞兒行

東嶽廟

南館除夜記懷 二首

題戶部侍郎金簡蕉園小像帖

贈戴翰林衢亨

元宵燈戲二十韻

文丞相廟

萬壽山 二首

皇都卽事

二月六日離北京途吟

白河途中又次上使韻

離燕兩日天氣晴和喜甚口占

香林寺

觀耕麥

薊州

再觀烟樹

玉田看新月次上使韻

又次效李義山體詩

發玉田

豐潤路中口占獻上使兼示三价

榛子店

沙河途中次上使韻

灤河清節祠

代墨胎子贈姜子牙

姜子牙答詩

代墨胎子贈箕子

箕子答詩

撫寧縣訪徐進士紹薪携登會心亭留贈

漢兒剃頭行

澄海樓五詠

出關

望夫石歌

暮入寧遠府

杏山道中

春分日宿生陽店

抵十三山

雪中向閭陽驛

雪後早行

東歸操

曉發羊腸河

登月峰霧中望遼野

夜抵白旗堡舊館

曉發向蘆溝河

渡遼行

到巨流河流漸塞津不得渡仍觀古戰場

朝日過河口占

高家店途中

又得原字

邊城店

朝發向永安橋

暮抵瀋陽

盛京

舊遼東

華表柱歌

踰磨天嶺

自恬水店向連山關

鷄鳴寺歌

到柵門

柵門卽事

後車不至淹滯一旬遣悶

同三价往見安市城登攢雲巖題名

出柵午炊溫井

曉渡鴨江

到定州書狀寄示一律走筆以酬

還到浪江

岳州錄

舍弟守岳州奉老為養請暇來觀詩以識之

設養老宴

步海州進士李一燧韻以贈之

葱秀山

朴淵

泛槎亭

花潭逝斯亭

小白錄

自忠州入清風

宿丹陽館登鳳棲樓志感

踰竹嶺到豐州順興榮川兩倅來迎喜題

順興浮石寺官程有限不得往見追寄主人

到豐基詣鳴鳳寺董役留題朝陽樓

題醴泉伴鶴亭

鳥嶺

自忠州乘舟下玉江月灘

過雙嶺古戰場

登南漢西將臺

耳溪集卷六

詩

燕雲紀行

壬寅冬以冬至兼謝恩副使赴燕鄭相公存謙為正使洪學士文詠為書狀官

拜表出郊

二首

筐篚西馳問幾年星槎十月又幽燕讀書未誦詩三百
 許國寧辭路四千征馬遲徊沙嶺雪行旌迢遞薊
 門烟眉間不作幾微色回首終南却黯然
 前席欣陪咫尺顏 玉音憂念遠途艱珍丸禦病風
 霜裏暖帽排寒渤碣間軒陛詎堪經歲隔王靈宜藉
 伴春還寸忱願獻重輪頌喜報應傳未渡灣



自坡州向松京

日出坡山畫角催長亭遠樹宿嵐開臨湍一帶城邊
盡崧嶽千峰馬上來故國繁華餘列肆麗王歌舞有
荒臺洛中舊要今留後官燭三更把別杯

花石亭敬次正使鄭公

存謙韻

故宅巋然客到稀臨江花石映朝暉庭前老栢寒逾
翠簷角閒雲宿不飛阿閣初看翔鳳下南陽未遣臥
龍歸高風緬邈今誰繼歎息斯文正脉微

松京懷古

古堞蕭條起白烟行人立馬夕陽邊山高水麗三千

里霧散雲消五百年廢井有欄螢自度荒臺無樹月
空懸終知曆數歸 真主歌曲于今巷里傳

善竹橋

三尺孤碑下馬看千年崧嶽並噴岈斷橋有血應成
碧朽骨為塵不改丹隻手詎能扶大廈一身猶足激
頽瀾至今聖代崇名節文物彬彬士趣端

到青石嶺入海西界

十載西州再到時當年部曲拜前麾江山不與容華
變謠俗頗隨歲月移無恠兒童皆老大縱聞名姓却
然疑碧城物色憑渠問池上紅梅長幾枝

發金陵向龍泉

行到金陵慣路歧登山涉水故逶遲
列郡依然曾駐節名樓多是舊題詩
衣冠遠送爭投刺父老歡迎或舉卮
却笑風流何淺薄故顏無復一蛾眉

自龍泉抵洞仙關

邑名鳳山驛名麒麟

海西前刺史遼北副行人縹緲山如鳳
飛騰馬是麟風光看不變歌管聽逾新
洞裏仙猶在應嗤白髮身
冒雨踰洞仙嶺入黃岡

嚴程萬里馬蹄忙寒雨漫天野色荒
劔水山回雲漠漠仙人關遠樹蒼蒼
臺隍北枕龍門險驛路西連鴈

塞長薄暮江邊聞鼓角雄城粉堞是黃岡

渡沮江登練光亭

十里長楸四牡閒朱甍翠壁映林間
澄江不變綾羅鳥微雪先消錦繡山
畫角三聲移綵纜平沙一帶列雲鬢
重來廿載渾如夢魚鳥惟應識舊顏

西京懷古

三姓興王閱幾年西京佳麗沮江邊
東明馬跡留雲氣箕子龜疇有井田
從古英雄多勝敗至今民俗誦仁賢
名區幸值昇平日冠蓋繽紛動管絃

箕子墓

空山浙瀝雨聲多
尋服玄冠掩薜蘿
洛邑何年朝白馬
涇江當日比黃河
西民尙食榆林葉
中國空傳麥秀歌
千里灤河心共照
月明風馬定來過

百祥樓觀劍舞

元帥轅門百尺臺
重城包絡面西開
樓臨薩水黃雲暗
天濶遼山朔氣來
塞上佳人能劍器
雪中留客有金罍
高歌一曲邊風起
醉下層欄夕景催

渡薩水有感

隋兵百萬化蟲沙
清薩千年起白波
前代興亡空水月
乙支勲業滿山河
華夷尙識三韓大
社稷終須一

士多獨恨往時南
節度男兒雖死睢陽何

倚劍亭與書狀共飲

歲暮邊城雪正寒
羈懷千里上危欄
浮雲古塞飛鴻度
落日陰山倚劍看
月下携樽成小醉
天涯回首隔長安
明朝又向龍灣去
白髮飄然再出關

入灣府

廿載龍灣眼更新
江山歷歷解迎人
車行熟路平如水
馬度長亭不動塵
昔日劉郎今白髮
重來遼鶴似前身
惟餘鐵串橋邊樹
曾見攀轅送餞辰

留題來宣閣

遼野茫茫鴨水深西風萬里一開襟天懸列宿分夷
夏龍臥長江閱古今東海提封從此盡中原文物向
誰尋少年謾負凌雲氣白首還成出塞吟

奉和正使韻

地盡扶桑國星析木宮行人方向北衆水自歸東
虎節衝遼雪貂裘下朔風江邊回首望朝日滿山紅
至日行禮館所述懷呈上价

共來千里外遽見一陽生日馭方南至星軺尙北征
未隨鷓鴣列翻向鳳凰城曉起看雲氣天時占泰亨
渡江

鴨水西連馬耳山寒雲滿日已凋顏馬行積雪層冰
裏路出黃茅白葦間舉足尋常非我土回頭造次失
龍灣紛紛吏卒臨江送爭說春風好好還

露宿九連城

遼塞荒城是九連星軒到此歇行韉黃沙大漠無人
跡積雪穹林伴虎眠縱有重裘寒似鐵獨將孤燭度
如年風餐露宿男兒事却勝蘇卿臥齧氈

過松鶻山野曠水清林木翳然宛似村落之狀
路傍有溫井長流不竭云

奇峰戍削鶻巢懸山勢繚回帶廣川漠漠荒田無鳥

雀依依遠樹似人烟風塵戰伐曾何世州郡遷移不
記年唯有路傍溫水井金流碧甃尚涓涓

宿葱秀山下恰似平山葱秀而奇秀過之傍有

魚龍堆

柵外山傳葱秀名清流翠壁宛平城潭深不動魚龍
氣洞邃如聞鷄犬聲即見似人猶可喜真同某水倍
多情回看故國踰千里魂夢惟應到漢京

入柵門二首

杖節西來關嶺賒邊門東向劣容車遼人慣見三韓
使燕路初開十月槎節使例以至月拜表故稱冬至使今年燕中將以臘日行年終

宴令我使來叅故始於十月念後離發傳食諸侯車百乘觀風萬里鬢

雙華中州自古文明地齊魯詩書問幾家

遼瀋藩籬是柵門將軍開鑰引東轅山河隔斷投鞭
水兵馬逡巡折柳樊華俗愛看箕子服灣兒多解漢
人言百年約束無塵警壯士何勞守塞垣

鳳凰城

東風倚馬鳳凰城民物繁華亞盛京地近青丘通海
賈疆連黑水宿蕃兵朱樓畫榜朝烟歛粉堞華譙朔
雪明安市故墟留勝蹟奇峰雲外立崢嶸

宿通遠堡向連山關

禹貢山河逾旅同幽燕又闢太和宮衣冠自是時王
制謠俗猶傳大國風滿漢八旗戎馬壯門庭萬里舟
車通判知天意非人力開荆須看樹立雄

青石嶺志感

昔我孝廟赴藩館時過此嶺遇
雨作短歌國人傳之今此第二三

四句即翻
歌中辭也

先王此地有悲歌青石嶺頭望草河何事遼山長慘
惓不堪寒雨更滂沱烏頭未變秦關雪龍氣終騰晉
水波臣子百年泥露恨蒼梧千里暮雲多

過石門嶺入遼野

千里營州縱目初石門高處駐行車青天半入全遼

地大陸西窮析木墟仁貴戰場飛鳥下慕容軍壘斷
壕餘混河亦是箕封內蹙國何年計太疎

自冷井向遼東

終日征車背日行歸雲去鳥摠關情冠裳不見中華
俗鷄犬猶聞故國聲舉目山河非舊主傷心城郭半
皇明奕棋翻覆元常事開口閒吟自不平

太子河

河古衍水世傳
燕丹所匿處云

寒江日落起驚波故老相傳太子河小忿無端挑強
敵疎才何必恨荆軻金臺月冷涓人市易水風悲壯
士歌可惜於期虛擲首羈魂應繞此山阿

詠荆軻

千古荆卿是妄人欲將徒手搏強鄰夫人匕首空求
趙壯士函頭漫快秦曹沫未還三戰地姑蘇先化一
朝塵縱然奇着成僥倖終是狗屠與等倫

觀白塔向瀋陽

征車軋軋馬蕭蕭朔野風高雪意驕去國自憐霜滿
髮隨身惟有劔橫腰城邊鶴返千年柱雲外鵬搏十
日遼此去燕京猶計月瀋河一帶未云遙

發瀋陽過磨刀橋

寒天漠漠暮雲橫古戍西風愴客情衰世君臣輕社

稷東征壯士恨崇禎長城自壞袁巡撫大樹空傳祖
摠兵獨有磨刀橋下水百年猶作不平鳴

自黃旗堡夜抵白旗堡

一旬遼野鬢添斑冰雪漫漫路轉艱五渡河過八渡
後黃旗堡入白旗間天低落日沉平地野濶浮雲化
遠山蓬矢四方曾有志身從王事敢求閒

一板門望巫閭

西行千里一旬餘野色蒼茫混太虛天際忽看青數
點土人道是醫巫閭

北鎮廟

珠溪集 卷六
秩祀幽都號廣寧雄蟠千里鎮玄冥天傾北極連箕
尾地盡東溟割冀青好向中華成障蔽誰令蒙古作
居停卽今外內無區域莫放驕兒近戶庭

十三山

遼州一望絕孱顏行色支離大野間鴨水東來二千
里燕雲西接十三山依微海上浮青蜃縹緲天邊列
翠鬟疑是楚臺添一朵夢中雲雨有誰攀

松山堡

是明兵
大劄處

蕭瑟荒山有斷松愁雲散盡月如弓干戈戰地餘紅
血風雨中宵起白虹北極朝廷桑海變東來冠蓋古

今同欲尋往事無人識惟見孤鴻叫碧空

寧遠城憶袁巡撫

轅門晝靜角聲遲羽扇綸巾坐運奇天地玄黃龍戰
野山河震盪火焚旗一時勝敗何須道萬事蒼茫祇
自悲嘔血臺前聊騁目應知中國有男兒

祖大壽牌樓

興寧城裏暫流睇雙峙牌樓屹路蹊斲雲根成畫
閣鋪張華誥煥璇題元戎四世雄遼左名閣千年愧
隴西石面崇禎磨不得何顏他日再攀躋

過東關驛向中後所始出遼野

行邁悠悠踏雪霜星軺倏已度遼陽
天長不盡風雲氣野曠偏留日月光
物色真堪供大觀羈愁忘却在殊方
文章豈是江山助自有瓊琚滿錦囊

遼俗四十韻

九日行遼野山河好眺瞻漢邊曾北拓
堯化想東漸始識乾坤大渾忘日月淹
飲冰寧憚苦飛雪豈憂霑路滑無停轍
風高不下幘雲連塵共暗天與地相黏
水散千條帶山無一點尖夸夫迷兩戒
和仲失西崦鴈翻難奔陣鷹眸可察纖
入春憂淤淖當夏遠蒸炎氣候紛多變
陰晴孰預占直方能厚載廣斥不流謙

元氣茫茫積新陽冉冉添天星分尾斗地寶富飛潛
風俗華夷半生涯水陸兼平田宜蜀黍遠舶或齊鹽
築室皆甃甃鋪筵盡葦蕪向明穿廣牖防火抗高簷
夾路開商店容車植巷閭汲泉肩兩桶刈粟手長鎌
馭馬同頤指驅牛不鼻箝禮賓先進茗禱佛每抽籤
聞語耳全裒逢人聽似譖豕無前代白衣自向時黔
襟袵交環結羹殮挾箸擣驢磨人力省銅器禁條嚴
土炕環烏椅金泥列畫奩女兒皆束趾男子但留髯
物色雖非古風謠亦可覘瀋陽大都會兵力壯鞞鈴
管鑰三京重衙門五部僉街衢咽蹄轂廛市堆銀縑

王漢集 卷六
行殿黃金榜高樓八角簾輝煌含月鏡旖旎動風帘
厮隸皆乘駿寒廬不盖苫強哉信無敵富矣豈傷廉
弱國鄰東徼卑辭畧小嫌昇平無内外文武久嬉恬
壯士疎弓馬奇才老研槩觀風多警省揮筆寓箴砭

山海關八詠

萬里崇墉擁帝居嬴家有此大門閭坤維北拓華夷
界天塹東吞渤海墟遼薊至今歸版籍漢唐依舊混
車書詞人莫笑勞虛築終是英雄計不疎
宰割幽青自禹功皇王封域盡燕東宋人竟未收河
北元氏公然宅土中曆數終歸 洪武帝山河大定

一衣戎百年世界浮雲變惟有高城屹半空

元勲壯蹟徐中山天下高開第一關萬雉翔空如鬼
設飛鴻折翼竟誰攀一朝忽見金魚碎中夜驚聞鐵
馬班不有吳兒輕引敵西湖雲氣或重還

桓公北伐至孤竹武帝東巡禮岱宗大憤神人誰復
識羽衣仙子竟難逢游談遂化燕齊俗豪俠尙傳王
霸蹤况是遺風好馳射居民不復力畊農

唐文皇帝昔東征黃鉞親將天策兵遂以至尊臨絕
塞寧知萬乘困孤城玄齡垂死留書諫仁貴捐生躍
馬迎從古明王勤遠畧不如高拱享升平

行宮飛閣鬱崔嵬風物森然滿眼開山斷秦皇鞭石
水雲橫遼后洗粧臺盈車鹿角吉林貢如屋橐駝沙
漠來包舉八荒超往古經營應仗出羣才

高樓極望憶皇華表裏山河映紫霞海內神州同傳
舍域中今日是誰家黃花古戍行人遠綠樹秦京駟
路賒萬里羈遊逢歲暮夕陽何處又悲笳
書生白首對青燈卷裏山河見未曾秋水詎能窺海
若夏蟲難與語寒冰龍門筆壯漢司馬巴峽詩奇杜
少陵不出戶庭知六合聖人猶復泰山登

射虎石

在永平府陽山

白草黃沙右北平漢家飛將此橫行鴈門未展封侯
志猿臂空傳射虎名千載英風生石面四時靈雨泣
山精至今飲羽痕猶在林月依微百獸驚

高麗堡

高麗堡下暫停車問爾何年此地居鄉國蒼茫山海
外生涯彷彿水田餘東風百五悲寒食華表三千夢
故墟欲操南音還背面未敢長語立躊躇

薊門烟樹

一幅山河似畫圖千重烟樹遠縈紆參差倒影時來
往激灩澄波乍有無野馬或能成海市風檣忽若滿

王澐集 卷六
江湖漁陽自古稱荒塞莫是靈華近帝都

薊州途中

禹跡芒芒到眼前九州疆幅望中圓燕雲大陸浮元
氣海岱諸山隱遠天商旅多騎冀北馬人家半帶薊
門烟曾從紙上依俛說今日躬來始豁然

宿燕郊

行行萬里度重關白髮昂藏興未刪青石以南都是
海玉田之外更無山詩情澹蕩烟雲裏歲色崢嶸道
路間一宿燕郊明發去神京佳氣且開顏

路傍乞兒行

兩兩乞兒立道周鳩面鵠形聲啞憂語音不通心內
煩以手指口如有求呼來象鞮問鄉邑云是流人自
薊州此邦風俗賤窮窶隣里親戚不相謀不幸歲饑
一失所糶四顧無處投楚弓得失真閒事秦人肥
瘠豈我憂但念四海皆同胞爾曹獨非橫目儔趣令
取與囊中錢何忍立視其填溝前人既過後人繼十
步百步停行轉嗚呼安得復見擊壤世普天無有匹
夫愁

東嶽廟

肅穆東皇儼袞旒金甍玉砌壯青丘爐烟岱嶽晴雲

合塔影扶桑曉日浮萬物發生資一氣四時芬苾閱
千秋列朝崇奉功逾廣制作瓌奇誰與儔

南館除夜記懷 二首

舊歲新年此夜中羈懷撩亂似飛蓬晨昏遠隔三千
里甲子今成六十翁鬢雪幾添愁裏白燈花偏向眼
前紅枕邊忽聞晨鷄唱喔喔聲猶故國同
每年今日問安時仙漏催晨候玉墀中使傳呼宣旨
下千官拜跪退朝遲殊方忽見青陽逼清夜空瞻北
斗垂雲外蓬萊何處是春光應遍萬年枝

戶部侍郎金簡送示蕉園小像帖名曰綠天圖

遂作長篇以題其後

洛城佳氣繞神嵩名園處處百花叢誰家一丘占清
幽芭蕉萬本礙晴空中有翛然野鶴姿滿庭濃陰退
自公翩翩翠扇如相迓脫帽露頂來清風微雨散珠
鳴琳琅明月流輝透玲瓏興到題詩當側理客來飲
酒勝碧筩復有奇石羅几案清峭宛似主人翁真是
野老閒趣足誰知司農職事雄朝元使者三韓客乘
槎偶然遊瀛蓬筍班傾盖卽傾心自言系出鷄林東
示我一幅圖與詩璀璨珠璣炫彩紅毛髮盡帶烟霞
氣丹青能奪造化功公卿風流重恬素始識化理方

昭融把筆欲和綠天歌大雅難繼聲泚泚但見公心
似蕉心千抽萬展自不窮

贈戴翰林衢亨

生平慕古人夙懷四方志每恨東海偏未覩中華懿
顛髮已種種偶充朝元使眼看神州大足踐堯封地
側聞有戴氏赫烏聲遠暨三蘇可並駕二陸方聯轡
狀元何英妙哀然爲國瑞無路接光輝願言徒傾跂
有客頗倜儻好文仍好義擬上光範書遂懷孔融刺
旣覲君子儀兼致主人意一見卽解榻再見更倒屣
談理如析毫論文已瘖哉上下揚千古快若并刀利

虛往每實歸亦足窺一二幸因蟠木容得識瑚璉器
縱未登門屏猶喜質文字王程有常限歸期在造次
睠言懷伊人寧無感氣類不意蓬萊客慙慙致珍餽
瑤函動光彩羅列文房四摩挲手不停箇箇香且膩
豈徒物爲美諒是賢者賜况我老翰墨真愜性所嗜
貺之由中心受言藏篋笥自顧疎且遠乃蒙不遐棄
無以答厚意禮際良可愧但願崇明德九仞加一簣
茫茫宇宙內孰非男子事惟能擇路歧然後造精粹
敢將一言贈聊披片心示精神貴相通何間山川異
春風動江海悠悠策征駟願憑東飛翼毋慳尺素寄

元宵燈戲二十韻

鬱鬱圓明苑春回霽景澄一年今夜月千古上元燈
特地張雲幄橫空起綵棚花幡森婀娜綺閣抗峻嶒
丹縞纒羣挽圓毬倏上升暗烽閃似躍穹腹坼如崩
錯落懸珠斗熒煌拖玉繩銀花飄萬點寶鏡掛千層
蟾影藏華渚虹橋笑廣陵璇霄方晃朗雷砲忽轟騰
火出同泉湧烟飛並霧興砰礮山欲裂絡續響相應
星斗光搖盪樓臺氣烘蒸散芒噴細霰流線疾飛矰
後殿紛來屬前茅却遞承三軍聽號令百鬼竄兢凌
畫障羅仙侶銅簾化老僧文成太平字歌競萬年稱

筆下描難盡人間見未曾豈徒觀盛麗知是導豐登

文丞相廟

寂寞衣冠伴小燈百年宗社兩眉稜延陵已識秦聲
大諸葛難噓漢火興天地分崩身獨立風雷震盪氣
齊騰塵埃滿壁無人掃惟有拈香一老僧

萬壽山 二首

荒臺無樹日冥冥輦路春回草自青舊物惟餘西苑
月夜深還照壽皇亭

中夜煤山聞子規飛飛四海托無枝却羨遼東華表
鶴千年猶有再歸時

皇都卽事

羽畎珠崖入版圖山河萬里撫庭衢燕中自古興王
地天下于今拱帝都節制八旗恢遠畧鋪張四庫盛
文儒時皇帝大聚天下書分經史子集名爲四庫全書合數萬卷募士民有文筆者給祿繕寫故云

昇平五紀超前代只是衣裳異典謨

二月六日離北京途吟

萬里歸程自此開星軺二月別燕臺扶桑曉日雲間
湧滄海春風馬首來物色更添詩興動流光偏與客
心催遙瞻故國何時到鴨水烟花把玉杯

白河途中又次上使韻

春風拂拂送行輶堤柳依依曉靄浮東過通州今幾
里白河渡口喚漁舟

離燕兩日天氣晴和喜甚口占

燕館支離閱四旬歸裝駘蕩伴三春柳絲嫩欲牽行
騎禽語欸如送遠人向日冰霜何慘冽如今雲物却
氳氳非關氣候殊前後揔是王靈暨使臣

香林寺

寺有白
幹松

路傍蘭若淨蒲團延客比丘戴角冠雲氣常留金塔
影春風不變白松寒謾教村女燃香供贏得行人駐
馬看只是沙門隣市井獨無禪韻見眉端

觀耕麥

農家二月報新晴處處田頭喚侶聲未到初旬分麥
種獨持長鏡帶驢耕從知土脉隨方異况得天時用
力輕遙想故園將有事我行安得及清明

薊州

勝蹟多傳遼薊間羣峰競秀帶清灣龍跳半夜滹沱
水仙化千年姑射山古渡迷茫何處是薊州東有小
渡俗稱滹沱
而據地志則滹沱正在燕
趙之間不得不下故云歸雲縹緲邈難攀空餘臥
佛留蕭寺閱盡英雄幾劫還

再觀烟樹

春來重到薊門前暖日和風更渺緜千樹齊浮滄海
上斷虹斜曳夕陽邊烟波瀕洞涵元氣村落迷茫混
碧天色相莫論真與幻泡漚世界孰非然

玉田看新月次上使韻

玉樓迢遞阻清宵幾日星槎到絳霄遙想禁城華月
夜仙郎共踏上元橋

又次效李義山體詩

蓬萊佳氣滿東天征旆悠揚去鳥翩神女弄珠遊碧
海真人種玉化藍田歸心快若遼東鶴行色飄然槎
上仙會到漢城春未晚嬌鶯嫩柳樂芳年

發玉田

行度盤山與玉田山川到眼倍鮮妍連天大野平如
海近郭長林淡似烟巷女簪花看使蓋村童挾冊乞
詩箋中華舊俗猶堪愛恨未吾行覩盛年

豐潤路中口占獻上使兼示三价

箕尾中間滯客星雲天遼濶隔滄溟含綸朔雪千山
白拂袖東風萬柳青趙璧已完隨使節漢槎無恙濟
君靈翩翩駟馬榆關路携酒同臨望海亭

榛子店

偶過榛子店遙憶季文蘭古驛春重到遼城鶴未還

空留題壁字何處望夫山蔡女無人贖遙瞻漢月彎

沙河途中次上使韻

東方欲曙又東行垂柳長亭小雨晴天海相連呼吸
氣山川不盡胚胎精奇峰筆秀昌黎縣孤竹風清肥
子城滿目韶光頻駐馬野橋流水聽春聲

灤河清節祠

二子遺祠枕碧灣清風蕭爽遠人寰松杉色映曾逃
海薇蕨香生舊採山沙淨夕陽雙鷺宿雪消春水小
舟閒門前一路通商野尙想當年叩馬還

代墨胎子贈姜子牙

天下曾同二老名馬前難挽拂衣行蒙茸一掬西山
巖不易全齊七十城

姜子牙答詩

八百諸侯會孟津天心難拂救生民白髮鷹揚吾豈
樂媿君千載植君臣

代墨胎子贈箕子

三仁莫救社稷傾天下其如會朝清公心已見傳洪
範白首何勞白馬行

箕子答詩

佯狂自靖豈全身君子明夷是得仁東海一隅存子

祀尋冠終不作姬臣

撫寧縣訪徐進士紹薪携登會心亭留贈

自其大人

鶴年以翰墨自娛尹白下淳曹參判命采
皆有手筆在壁上故手寫一絕以贈之

雲間削立玉芙蓉奇秀應爭五老峰何年吏部騎龍
去靈氣由來不盡鍾

屬邑有昌黎縣奇峯秀麗名曰
文筆世傳韓子先墓在其下云

漢兒剃頭行

剃頭復剃頭兒在膝上啼兒兮慎莫啼我心已酸悽
更怕他人聞聲音且宜低昔我初舉汝額角豐如犀
謂言待長成小兮又弁兮歲蕤垂纓長崔嵬與簷齊
三加速賓友祝以成人道周旋有光輝將慰乃翁媪

今汝未免乳出入猶在抱忍剪鬢髮還覆猩猩帽
豈不美且媿那辨長與少先王制衣裳元服最居先
瞻視貴尊嚴藻飾尚華鮮御史獬豸角學士金貂蟬
高人抗方山良相戴進賢汝啼竟何知汝生真可憐
且留一握寄腦底聊別婦人與男子冠者明日當廟
見但恐吾祖不識爾嗚呼蟬有綏兮鷄有冠吁嗟人
兮不如彼殷周冕何處見他日指點圖畫裏

澄海樓五詠

澄海層樓壓巨鰲烟雲浩淼濕征袍媧皇斧影青冥
遠秦帝鞭痕斷石高好倚朱欄觀出日尙留銅礎捍

驚濤河源使者乘槎返欲借長風狂碧霄

醉倚高樓一放歌乾坤漭蕩混空波鯤鵬北徙猶餘
地江漢東歸不滿科始信日輪如蟻磨回看塵界等
蜂窠吾心更有無量法勺水滄溟未較多

海上峒嶠百尺臺東南天豁眼前開長城近入虛無
盡白日遙從曠漠來萬里冷風初滿袖三春灝氣且
銜杯英雄事業空流水彈指千年一笑回

秦皇漢武昔求仙幾遣蓬壺採藥船已向人間窮樂
事還思物外學長年雲迷岱嶽唯空語風起驪山竟
冷烟堪笑當時眼穿處不離東國小洲邊

碧海黃塵摠杳茫浮雲去鳥異閒忙田橫古島青於
水姜女孤峰白似霜豪貴掀天寧把玩風聲從古獨
留芳乘桴更憶宣尼叟回首中原感慨長

出關

殘月熹微曉角催轡車復向長城隈秦關不待鷄聲
出漢節初隨鴈影回山色喜看歸路近村容如見故
人來前臨遼海連箕域騁目還登古將臺

望夫石歌

在
山海關外
姜女廟後

山頭一片石屹立青海傍偃蹇不受秦王鞭孤潔頗
似貞女腸行人借問貞女誰許氏少女字孟姜姜女

少小何窈窕嫁與東隣范家郎郎年弱冠卽從軍迢
迢萬里戍漁陽青鏡持贈別後面纖腰未脫嫁時裳
少婦不解別離苦娉婷十年守空床金微草白風雪
虐玉窓花飛歲月忙長城之役何太急天子威令寒
如霜千杵不堪筋骨絕一身誰洗刀箭瘡昨夜深閨
夢郎至顏色憔悴言未詳恹恹驚覺妾心動倉卒清
晨起嚴裝弱質不憚度關河柔情那忍別爺孃千苦
萬辛到榆塞郎君蹤跡竟杳茫始言某年石壓死或
說何方戰陣亡城邊積骸與城齊子之丰兮何處僵
人情到此可奈何惟有昂首呼穹蒼淚盡氣竭聲不

續彷徨更陟山之岡朝朝暮暮望郎來愁雲霏霽海
天長齊城已崩哭杞梁湘竹空斑泣娥皇明月夜伴
山鬼啼滄波春與水禽翔長留拳石水不齧但聞驪
山草已荒君不見東海又有堤上妻千載芳魂永相
望新羅朴堤上使日本不還其妻上鷄述
嶺望夫痛哭而死邦人立祠其上故云
迎神辭曰採白蘋兮杜若香挹清水兮奠椒漿星冠
兮月珮風肅肅兮滿堂郎之來兮乘白馬形恍惚兮
夜有光魂兮徘徊水一方

暮入寧遠府

長洲近海氣濛濛官樹依微翳遠空芳草春生鶴野
外行人家在鴨江東輕塵不動前宵雪征旆長搖盡
日風歸馬自尋寧遠路城樓一半夕陽紅

杏山道中

關內柳已黃關外草未萌關內麥始畊關外雪猶橫
地氣殊海陸天時換陰晴遙想鴨水濱尚隔千里程
春寒正凌厲况乃玉樓清耿耿懷北望悠悠向東行
仰視浮雲邁時聽飛鳥鳴覽物多寄興誰識遊子情
春分日宿生陽店

流光歸思兩無垠驛路初逢晝夜分章亥未能窮地
步客星空自動乾文春風曉捲巫閭雪海氣晴噓碣

石雲更喜野亭同翠管生陽館裏倍氤氳

抵十三山

春風還到十三山雲裏丰茸見舊顏更愛雪消真面
出蛾眉新攢碧螺鬟

雪中向閩陽驛

春深猶下雪造化亦多奇薄送餘寒去旋噓暖氣隨
牽風初似絮灑地却成絲着樹翻生色籠山競獻姿
輕盈如意舞颯爽有聲詩點點微霑袖搖搖不滿旗
征夫愁路滑農戶喜田滋麗景添鳩觀詞臣賦鳳池
每逢佳興到偏起美人思悵望東天遠歸雲度嶺遲

雪後早行

官柳青青曉色新閩陽郭外有行人天風吹下巫閭
雪淨盡遼東九郡塵

東歸操

行行重行行千里復千里已再涉我行殊未已
去似船上瀨歸若魚縱水昔作隨風旌今同脫弦矢
山川豈有異人情信若此去路日以遠歸路日以邇
翻思去時愁當識歸時喜

曉發羊腸河

地近鄉思促歸人可早行起看殘月色坐聽衆鷄鳴

岸雪遙尋路村燈或借明車來渾不覺隱隱聞鈴聲

登月峰霧中望遼野

行到月峰上登臨望眼饒天邊看左海霧裏失全遼
野樹疎還密人家近却遙歸心正浩蕩禽語自成謠

夜抵白旗堡舊館

晴雲生驛路暖氣入平原雪溜隨車跡春泥上柳根
鳥啼烟外樹犬吠水邊村舊主能迎客斜陽淨掃門
曉發向蘆溝河

歸馬翩翩又向東長亭燈燭曉烟籠林間遠色遲遲
白海上浮光冉冉紅草木自生元氣裏風雲相盪太

虛中故鄉消息經年隔猶喜天邊聞叫鴻

渡遼行

汀洲楊柳綠旖旎行人曉渡遼河水遼河舊是箕子
地東去鴨水一千里行人去時冰塞江今日歸來波
瀾瀾春風裊裊捲行旗官路連天直如矢山頭白日
自東出雲外候鴈更北徙漢城桃李將爛漫我行幾
日當到此

到巨流河流漸塞津不得渡仍觀古戰場

江霧陰陰春不開行人立馬久徘徊千年古壘沙沉
戟萬片流澌雪擁臺戰骨已隨河水盡寒鴉空帶夕

王澐集 卷六
陽回爭城爭地渾無跡樵笛漁歌響自哀

朝日過河口占

憑軾度烟汀捲簾看曉星遠山浮寸碧平野入空青
杳杳連天樹依依近水亭春光增澹蕩知是向東溟

高家店途中

東指瀋陽路雲間見數峰輕烟天淡淡暖日水溶溶
春入鳥聲淺山餘雨意濃韶光與詩興千里兩相從
又得原字

遼河東畔亦平原古戍斜烟逗去轅日晷短長看柳
影江流深淺見沙痕牛羊自識來時路鷄犬遙喧何

處村薄暮前溪尋舊店酒旗風裏半開門

邊城店

野渡遲三夜關山滯二年馬前看落日樹底見遙天
驛路橋邊柳人家水上烟征車猶未息暝色已蒼然
朝發向永安橋

平田渺渺水潺潺天際微雲澹遠山春草欲萌空翠
濕光風多在馬蹄間

暮抵瀋陽

麗日輕風淨海氛車塵旗影去繽紛雲迷檀嶽猶千
里春到瀋陽過二分歸思汪汪隨逝水長亭歷歷送

耳溪集 卷六
斜曛新年不見東來客天末初看鴈數羣

盛京

白頭山下射雕歸黃草嶺前萬馬肥大漠飛騰龍虎
氣明末東北方常有氣如火蓋是清人將興之兆故云雄城睥睨帝王畿雲生
黑水成豐沛天送長星入紫微席捲八荒高一榻福
陵梓樹已盈圍

舊遼東

千載興亡劫火殘春風歸棹倚蓬看孤城對水漁歌
迥古塔浮空鶴影寒但見荒臺餘斷礎誰知耶律與
完顏獨憐萬曆雙游擊一渡龍灣更不還
游擊史儒戴朝弁敗

死平壤

華表柱歌

華表柱前客徘徊仙人一去餘空臺昔日仙人騎鶴
去他日仙人化鶴來爲仙爲鶴今幾度滄海水淺起
黃埃秦帝樓船空悵望漢家祠宮漫崔嵬年年故墟
春重到碧草如烟野花開

踰磨天嶺

遶樹千崖轉摩空一徑分石泉常帶雨山火欲燒雲
洞邃藏春色峰高逗夕曛祇應花信晚巖雪落紛紛

自恬水店向連山關

耳溪集

卷六

詩

三

三旬迤邐大野間歸路始入連山關青石嶺磨天嶺
行盡一山又一山娘子河恬水河深深瀨與曲曲灣
依巖籬落兩三家棘扉茅簷更蕭閒村婦繅絲倚短
機樵童驅犗上危巒三月三日日正長野馬浮空谷
鳥喧車檐影入雜樹交馬蹄聲生亂石斑崖雪初消
磴路滑僕夫謳吟愁躋攀為是故國看不遠溪山處
處自開顏

鷄鳴寺歌

在娘子店南俗傳唐太宗兵敗失路尋鷄聲
到此投宿天明視之乃是空山但見小石如

鷄命建寺以護之

娘子山下風雨聲娘子山上一鷄鳴鷄聲喔喔復膊
膊半夜何人匹馬行遼陽千里陣如雲大唐天子東
出征清秋斧鉞下青冥白日金鼓震滄溟龍旂高豎
駐蹕山虎旅空老安市城元戎左次夜捲甲大風揚
沙迷去程虬髯日角路彷徨四野蕭條天冥冥前山
隱隱聞鷄聲深樹依依見柴荆尋聲步步入山蹊有
女嬋娟如相迎黃梁白酒救龍饑洗滌烹煎旨且馨
壺食頗似僖羈妻豆粥還同蕪萋亭東方欲明曉氣
寒露濕龍袍睡初醒空山寥廓不見人數點殘星天

耳溪集 卷六
際橫如夢如真久然疑悄然四顧心更驚眼前惟有一拳石冠距天成宛如生得非穀城黃石神無乃陳倉碧鷄精由來聖人百靈護六飛高驤四海寧我見石鷄長歎息堂堂萬乘胡自輕嗚呼房魏不復作千載蘭若空崢嶸

到柵門

兩扇木城開未開歸人到此更遲徊盈盈一水何時渡點點遙山入望來星斗闌干空擊柝春風浩蕩獨登臺身邊安得冲霄翼香案前頭捧玉杯

柵門卽事

遼陽東八站太平滿人居胡女能馳馬山僧好跨驢生涯無市肆職事但耕耨獨愛三韓近盤登鴨水魚

後車不至淹滯一旬遣悶

春光處處揔堪憐隔水思鄉倍悄然欲雨不雨雲如海將歸未歸日抵年聲音入耳增煩惱杯酌澆胷只醉眠十日淹留無一事晴窓獨坐檢詩篇

同三价往見安市城登攢雲巖題名

安市城中匹馬來白雲無盡鳥飛迴撐空劒閣千峰立入谷車箱一線開天子徘徊餘舊壘將軍長揖有高臺三韓使者題名去墨字縱橫破碧苔

出柵午炊溫井

行旌拂拂兩驂齊野色青青萬柳低雙袖風生如傳翼輕車路熟不黏泥依山茆舍連芳草隔樹行厨傍碧溪滿岸杜鵑紅欲坼關關好鳥向人啼

曉渡鴨江

青春還到鴨江前嫩柳新花漲曉烟波靜魚龍迎使節沙明鷗鷺導行船雲幕相連人似海錦帆高掛水如天經年去國歸思急征馬長嘶向日邊

到定州書狀寄示一律走筆以酬

旅鴈差池各後先雙星昨夜向東躔短籬數尺華夷

界別酒三盃野水邊鶻岫雲烟尋去路鴨江花柳擁歸船統軍亭上重回首冰雪驅車想去年

還到溟江

萬里春風駟騎催中原使者隔年回車隨洛水青雲去人帶函關紫氣來故國衣冠團錦席清江鷗鷺暎金盃往時雨雪霏霏處碧李紅桃滿眼開

附華人題評

嚴滄浪論詩法有五曰體製曰格律曰氣像曰興趣曰音節五者俱備然後可以言詩耳溪洪先生雅工篇什所作遼薊襍詠十數首或繩古

以崇辭或隨方以合度其體則正也其律則嚴也其氣像則超而音節則亮也又有山川之眺覽景物之流連以資其才而暢其氣譬之溟渤日瀉不窮其間大波小瀾疊相推助循是而龍門焉積石焉以上游乎崑崙之墟所得不綦廣乎因讀其詩而徵諸滄浪之說乾隆甲辰春二月上游大庾戴心亨題

岳州錄

岳州先祖舊莅也小子忝按本道巡節凡三到而舍弟又蒙恩守是郡奉老親爲專城養余請

暇來觀太守備儀郊迎回憶辛卯春以新恩到碧城時同一勝事莫非國恩也先休也詩以識

之甲辰

檐帷三度駐西州屈指天星十五秋歷歷湖山呈舊面紛紛父老擁行軻萊衣更覺君恩重棠茇多慚子惠留當日簪花今佩印弟兄聯武摠先休

設養老宴

四世桐鄉一岳州聯翩棣萼繼前休峴碑尙播遺民頌春酒還斟舊澤流鶴髮爭携鳩杖舞燕毛齊祝兕觥籌願將七十餘人壽並獻萱堂與玉樓

步海州進士李一燧韻以贈之

芙蓉堂上折花時湖海重逢十載遲
抵掌子猶奇氣在掀髯吾已老翁爲空慚
句裏歌棠樹且向樽前聽竹枝會待角巾歸
穎尾疋驢相訪把閒卮

葱秀山

去年三月度遼城葱秀山上雪猶橫
今年三月到海西葱秀山前花政明
年年此時過兩地物色雖同風氣異地之相去千里餘
清流翠壁何相似斷崖中坻流靈液奇松倒掛含灑氣
攀蘿酌取玉溜泉飲此可以洗塵髓石面誰刻衣冠影
故老相傳朱太史太史

當年留健筆華人亦愛此山水嗚呼古壁長如舊
安得復見皇華使

朴淵

崩雲抉石擘爲門急水騰空白日昏
知有老龍深處睡滿山禽鳥寂無喧

泛槎亭

遠望山腰拖白雲忽看飛雪落紛紛
映空日色參差見滿岸風聲斷續聞
萬壑奔流長盪擊三春佳氣失氤氳
重來廿載餘高興獨倚孤亭抵夕曛

花潭逝斯亭

潭上觀魚有釣臺閒雲孤鶴與徘徊先生一去空流
水古木春回花自開

小白錄

乙巳以雲觀提舉承命詣豐
基監董景慕宮胎室石役

自忠州入清風

四郡重來六載餘疋驢今又換輜車鬢邊淺白都成
雪獨怪風流老不除

宿丹陽館登鳳棲樓志感

何年羽化梯吾祖昔攀躋往躅思鳧鳥名樓有鳳棲

青編傳傑句白髮對遺黎

王考於庚戌莅茲邑今已
五十餘年遺老盡矣惟有

一老校故招見話舊
詩集中多丹丘作

怛悵憑虛檻惟聞谷鳥啼

躅竹嶺到豐州順興倅鄭子敬

持淳

榮川倅鄭

君來鼎

來迎喜而題贈

地劃辰韓國星分大角墟民風先稼穡儒化本詩書
昔佩東都綬今乘熟路車故人多郡縣樽酒好相於

順興浮石寺官程有限不得往見追寄主人

浮石寺懸百尺臺天風拂磬殿空雷仙飛一朵花開
未擲杖禪翁不復來

到豐基詣鳴鳳寺董役留題朝陽樓

靈鳥曾鳴第幾峰中天削立玉芙蓉山深奇木僧俱
壽石坼飛泉日並春福地三韓藏寶匣祥雲千載護

雙封

同岡有文廟胎室故云雙封

豐碑

聖孝傳無極一幅移摹

獻九重

題醴泉伴鶴亭

昔歲戊申王考莅是郡小子方五齡隨到今年六十二以豐基奉審使歸路歷入則山川都未省識惟伴鶴亭池臺宛如童子時所遊登眺移時愴然而題

嶠左名州號酒泉昔從吾祖戊申年六十星霜遺老盡池臺一曲尚依然

鳥嶺

天設重關一劔多三韓有此好山河至今痛恨申元帥空使蠻兒掉臂過

自忠州乘舟下玉江月灘

三月輕舟下玉江明沙芳草白鷗雙帆過急灘風拍岸飛花無數落蓬窓

過雙嶺古戰場

山鳥啾啾山日昏懸崖千尺倒松根村人莫釣前潭水魚腹應藏義士魂

登南漢西將臺

飄搖絕頂倚天風朝靄空濛日脚紅試使行人山下

望此身應坐白雲中

耳溪集卷六 終

耳溪集卷七日

詩

關西錄

四月二十六日宿金陵館是余晬日有感而題

慈秀館

洞仙嶺

麟蹄倅申文初 光河 千里遠訪携上江樓

麟蹄倅住祥原衙中寄詩走次

大雨初收登練光亭觀漲

登長樂宮舊墟萬壽臺

七月既望泛舟沮江滌上浮碧樓

發南巡

東明王墓

入三登縣乘小艇滌上鸚鵡洲有感而題

宿江東縣

降仙樓

泛舟沸流江滌洞十二峰下

暮雨臺

宿殷山

慈母山城

梨花亭

發三和向江西

午炊平壤狄橋院冒雨還營

百祥樓

渡博川大定江

緩帶軒

倚劒亭同諸守令觀劒舞

過東林左峴城向鐵山

入灣府

館于鎮邊軒

同諸倅出百一院試武士又令妓女馳馬長楸
乘月登統軍亭點烽軍仍舉火見戌卒相應

午炊玉江鎮舍

踰延坪嶺過五丁峰入昌城登南門樓

夜宿制勝堂有出塞之感

九月二十二日千秋節也途中口占

午炊古昌城

自古昌城向當峩山城

龍湫

寧邊途中

登鐵甕山城東臺

無盡臺

涓江水解登練光亭

發春巡宿祥原渡鸚鵡洲下流

到江東觀萬柳堤新碑留題一絕

三宿留仙觀題柱聯六句走草一絕以識之

早發踰牛蹄嶺午炊于泰川之自作院

取路中山入龍灣界始得平野

觀獵威化島

白馬山城拜林將軍慶業影堂

聽流堂杜鵑滿山登天淵亭觀舞

向嘉山

冒雨向肅寧

暮抵安定道吟

還平壤

鄭甥東榦登科榮到浪上設宴志喜

奮武臺落成讌詩

石湖亭

萬景臺

發巡渡江東南江向三登

留題黃鶴樓

留成都試儒武乘月泛舟沸流江

夜宿留仙觀枕上聞簫聲

殷山澹澹亭和李東岳壁上詩語

發北巡向安州

望海亭

發寧邊

宿標興館早發入香山

普賢寺奉玩西山袈裟寶珠天朝諸將筆蹟

登上院觀三瀑

自上院到內院始得一山全面

引虎石

冒雨出山渡月林江

發龜城踰大小青龍嶺

納清亭

夜宿運籌軒次壁上諸公韻留贈柳節度

旬日自順安還營

向晚登鏡波樓

浮碧樓

燕雲續詠

至月初七到箕城宿練光亭

壬子以巡節賑清北今行諸邑耄倪遮道致謝

聽流堂

入龍灣

士民持壺酒處處迎拜安有遺惠可見厚俗

渡鴨江夕抵九連城露宿憶鎮江古蹟

夜宿燕秀山下

午炊鳳城宿松站

自黃家庄向通遠堡

入境三日記所見聞 二首

度會寧青石兩嶺宿娘子山

登石門嶺望遼野

觀白塔宿迎水寺

早發向爛泥堡始入大野

午炊白塔堡冰渡渾河

向瀋陽

曉發高家子過周流河轉向新民屯

過白旗堡始入遼西猶是箕子舊境

午炊中安堡

早發閭陽驛遼野將盡巫閭漸近

宿十三山

渡大凌河望醫巫閭

過大小凌河抵宿高橋堡

午炊連山驛向寧遠城記遼左風俗

自沙河所向東關驛

遼人善畜牧牛馬豬羊各順其性聊記其實

曉發向中前所月色如晝天野一色亦一壯觀

登吳王臺望姜女廟會副使書狀小飲

暮入山海關宿紅花店

途中望見撫寧昌黎諸山詩以賦之

榆關秀才齊佩蓮迎候店舍步其韻書贈

自撫寧縣抵宿永平府

向沙河驛路傍多大樹漫吟

過昌黎縣右北平緬懷古人自起羈愁

暮抵豐潤登文昌閣

到高麗堡招問父老無人識古事者悵然而題

道薊州望見漁陽橋抵宿邦均店

薊門烟樹

早發遇雪午炊棗林庄向燕郊

燕郊途中

終日大雪千里一色亦是中州大觀

午炊大王庄向朝陽門

歲除日叅宴于保和殿

記中州弊俗

同進賀使與紫光閣宴遊太液池

贈禮部尚書紀曉嵐句

禮部侍郎鐵保手寫一聯詩見贈詩以謝之

上元夜同進賀副使鄭台道以大容游南海子

自圓明園向西山渡十七橋登望蟾閣

泰山高歌題墨莊李翰林鼎元登岱圖帖

進賀使先歸詩以送別

紀曉嵐有知音之感出都門聊賦惓惓之意二首

滯三河縣示副三价求和

步書狀韻

發玉田向豐潤

贈孤竹居士李美

道見漢女扶杖短步聊識僂俗

自沙河驛向永平府

追記燕京見聞

記道中所見以牖東俗

遠遊記懷

撫寧古多名宦石樓金榜照耀城內

澄海樓觀日出二首

出山海關宿兩水河

發向寧遠衛近海多風竟日掩轎窓而行

大風終日留滯寧遠城底有感而作

自寧遠向高橋堡

午炊松山抵雙陽店

發雙陽店渡大凌河舉目山河自然興感

過十三山宿閭陽驛

向北鎮廟觀醫巫閭題贈守僧

中安堡途中

記遼薊女俗

渡羊腸河冒大風宿小黑山

發高家子午炊大方身

瀋陽

白塔堡

爛泥堡途吟

午炊冷井龍灣吏持家書來待詩以志喜

踰青石會寧兩嶺

春分日天氣晴朗我境似同然喜而賦之

過鳳凰山向柵門

小望到浪上宿練光亭

宿黃岡齊安堂觀劍舞

耳溪集卷七

詩

關西錄

辛亥夏薦拜平安道觀察使

四月二十六日宿金陵館是余晬日有感而題
青石嶺頭候騎迎金陵館外角聲清七旬又值懸弧
日十載重膺杖節行撫壯自嗟容髮改分憂敢詫翰
屏榮拜辭玉陛今三宿北望彌深戀闕情

葱秀館

卅載西關路五過葱秀山朱書留石面白髮對螺鬟
石壁有朱天使之蕃書玉溜泉三字物色猶前度浮生老此間沙鷗飛

耳溪集 卷七
欲近應識舊時顏

洞仙嶺

滾滾光陰廿載間
熊車又出洞仙關
甘棠已老芙蓉閣
玉節遙臨錦繡山
羊子風流聊可跂
張公節制若爲攀
南風吹長青青麥
攬轡詢農未覺閒

麟蹄倅申文初

光河

千里遠訪携上江樓

楊柳青青黃鳥啼
故人相見淚江西
臨流盡閣雲間聳
並岸長林帆外齊
箕子城平餘獸角
天孫石老又麟蹄
綺筵酒半笙歌動
白髮高吟興不低

麟蹄倅住祥原衙中寄詩走次

騎麟仙子厭幽棲
疋馬箕城訪耳溪
花柳三春忘遠近
關河千里盡東西
登樓縱目詩如湧
把酒掀髯氣不低
信宿江頭仍送別
歸雲渺渺草萋萋

大雨初收登練光亭觀漲

箕城東面衆流同
城上高樓漾碧空
白水光翻天地外
青山影入畫圖中
魚鱗萬戶笙歌迥
鷓首千檣陸海通
刺史閒行新雨後
桑麻處處樂年豐

登長樂宮舊墟萬壽臺

老木層臺壓古城
檀箕去後又東明
衣冠屢改千年國
榮戟今開萬戶營
長樂宮前餘草色
朝天石上有

王溪集 卷一
波聲浮雲往事無尋處斜日登臨感慨生

七月既望泛舟沮江滌上浮碧樓

大同江上泛仙舟微雨新晴夕靄收一年明月中元
後半夜清風大火流麟窟爭如赤壁勝玉簫今繼子
瞻遊空明擊汰星河動積水無邊萬象浮

發南巡

抗節東明館前驅沮水邊魚龍驚畫角鷗鷺避樓船
江濶輕裘外風生攬轡前敢言千里遠西顧重藩宣

東明王墓

盖有東明墓穹然若斧堂玉魚今寂寞麟馬竟荒唐

事業千年國精靈異代王遺民懷舊德時節每焚香

入三登縣乘小艇滌上鸚鵡洲有感而題

四入朱蒙國再登黃鶴樓江山如昨日雲月又清秋
鷺渚添新漲漁舟隱晚洲大書留壁面回憶少年遊

宿江東縣

江東是余舊莅也已卯春築長堤種柳以距
水患立石記之名曰萬柳堤不數年萬柳成
林水害乃去邑村殷盛今已三十餘年苑然
可觀

旌纛歲蕤滿路光玉麟腰下換銅章遼城復有重來

鶴玄觀爭看前度郎某水釣遊皆指點當時部曲半
凋亡惟餘萬柳青青色手植今成拱抱長

降仙樓

左海偏鍾造化奇天孫麟馬昔來思樓臺直與江山
遇朝暮翻看變態宜玉立精神霜落後風來消息月
明時更從十二欄頭望羽蓋霓裳處處疑

泛舟沸流江滌洄十二峰下

輕舟搖曳玉簫橫微雨初收水色清峰勢相聯纖欲
斷江流如沸靜無聲簾櫳隱映留仙閣雲樹葱籠紇
骨城卅載前遊渾似夢壁間遙指舊題名

暮雨臺

在降仙樓前

佳人唱罷步虛詞神女峰頭日落時一陣清風江霧
捲碧天如水雨如絲

宿殷山

恠底東韓地殷州在此間水朝箕子國疆接伯夷山
栢社傳遺土周家漏庶頑溪亭名澹澹官舍亦清閒

慈母山城

驅馬上層巘南臨慈母山削成千仞壁雄峙一夫關
萬子名何異將軍戰不還

萬子樓是將臺名流傳異蹟

遺祠巋然

立留與後人攀

梨花亭

在永柔客舍傍
是壬辰駐蹕處

佳麗清溪縣梨花有古亭
島夷昔深入天步暫西停
指畫山河定昭回草木馨
藩臣懷曠感愀若拜彤庭
發三和向江西

南巡十郡一旬旋行旆
逶迤並海壖千里湖山人
自得三秋禾黍野無邊
夕陽牛馬歸深巷浦口魚
鹽泊遠船更喜車前民
牒簡由來上瑞在豐年

午炊平壤狄橋院
冒雨還營

行近箕城望轉奇
雨中旌旆故遲遲
臨江大野平如掌
匝地羣峰嫩似眉
城裏不知藏萬室
路傍忽見列

千旗一聲畫角饒
歌動處處攔街士女嬉

百祥樓

半醉黃花酒登臨
一放睇江流千里曲
樓壓萬山低地坼清川
北雲橫紫塞西日邊
消息遠秋思自淒淒

渡博川大定江

一路分南北清川對博川
江村皆面水民食半依船
風氣元殊別光陰又變遷
重陽節已過誰與醉芳筵
緩帶軒

清北新安府關西控制雄
地形山野半生理舟車通
官路直如矢層城環似弓
衣冠多盛族宛有上畿風

倚劔亭同諸守令觀劔舞

高秋塞外鴈聲長
弭節宣城菊有黃
畫閣三更燈似月
佳人雙袖劔如霜
風流不與鬢毛短
詩令渾忘夜氣涼
更喜嘉山嘉客至
他鄉相對醉重陽

過東林左峴城向鐵山

何年築左峴西塞在門庭
天入秦壺口山圍趙井陘
一夫當萬騎千里按重局
北路通遼薊龍灣似建甌

入灣府

廿九年光擁節回
清秋畫戟壓江開
山川不改釣魚港
父老猶傳聽訟臺
半月三刀真似夢
觀風千里愧

非才街兒漫唱來
何暮白髮其如鏡裏催

館于鎮邊軒

秋風駟馬入龍灣
行色依然似錦還
千里再來前令尹
廿年重對舊河山
樓臺尙記投壺處
雲物都輸拄笏間
况有故人今作主
清樽華燭供歡顏

同諸倅出百一院
試武士又令妓女馳馬長楸
吉日平郊建纛牙
鶴鵝千隊靜無譁
健兒盡佩紅氍毹
輶姹女皆騎白鼻騮
玉帳風翻旗似火
轅門日射劔生花
封疆一帶狼烟息
閒對遼山聽鼓笳

乘月登統軍亭
點烽軍仍舉
火見戌卒相應

鴨綠江頭白露橫
統軍亭下夕烽明
滄波不動魚龍伏
塞月無邊鼓角清
柵外獵烟何處起
沙前戍火應期迎
遙看馬耳雲間聳
却憶當年踏雪行

午炊玉江鎮舍

孤亭臨峽岸奇絕
驗前聞窈窕羣峰合
彎回二水分玉灘
明似雪劍岫碧於雲
可惜江山勝虛拋
獵戍羣踰延坪嶺
過五丁峰入昌城
登南門樓

棧路初開萬木焚
輕車又滌鴨江濱
弓彎急水疑穿峽
劍立尖峰欲剪雲
舉目却嫌天地窄
回頭忽覺華夷分
邊門獨數昌城重
隔岸縱橫見甲軍

夜宿制勝堂有出塞之感

歲暮天涯客思催
邊門九月獨登臺
浮雲漠漠山河遠
落葉蕭蕭風雨來
半夜嚴城空擊柝
中原舊域且啣杯
京華消息違千里
南鴈今無向北回

九月二十二日千秋節也不勝北望之戀途中

口占

行邁悠悠江水東
流光冉冉思無窮
天涯正值千秋節
時序方闌九月中
清夜高樓頻望斗
金門曉漏阻呼嵩
遙知北苑宸遊處
寶幕雲開萬葉紅

午炊古昌城

江邊七郡列碁同，復嶺重重鳥道通。
萬木烟雲秋雨後，數家砧杵夕陽中。
生涯淡薄惟耕火，風氣勅強好挽弓。
千里提封從此盡，北來無復見飛鴻。

自古昌城向當峩山城

輕車窮絕徼，官路掛層峰。
斷壁熊懸掌，穹林鹿出茸。
邊風惟射獵，民業亦耕農。
逃矣王京遠，斜陽已舉烽。

龍湫

在山上絕頂

急水懸崖盡日春，滿空寒籟落高松。
飛時若散峰頭雪，深處疑藏鉢裏龍。
橫圻石門終不壞，斲來山骨渾無縫。
如何勝地淪荒域，子厚文章恨未逢。

寧邊途中

十日巡荒塞，今朝始解顏。
天晴收朔氣，雲豁見香山。
不復聞金柝，真如入玉關。
褰帷無訟牒，行色自清閒。

登鐵甕山城東臺

清秋斧鉞上東臺，包絡雄城何壯哉。
列嶂千重深似甕，長江九曲小如盃。
干戈久偃升平日，絲繭須兼保障才。
元帥移營非遠畧，試看天柱近河魁。

無盡臺

朝陽地接妙香東，一曲清江上有楓。
兩岸不隨波勢轉，高樓長立水聲中。
晴沙暎日娟娟白，落葉翻風片

片紅醉倚危欄塵慮淨閒將龍節對漁翁

涇江水解登練光亭

東韓佳麗最西京三面長江鏡面平
溝洫尙傳箕子井山河宛似石頭城
千年不改烟花色萬戶常喧歌吹聲
更喜邊疆無一事元戎暇日省春耕

發春巡宿祥原渡鸚鵡洲下流

祥山半巖邑山路少平臯亂石森牙角
矮松倒髮毛早犁初墾土宿麥已升膏
忽見春流漲晴沙繫彩舫到江東
觀萬柳堤新碑留題一絕

萬柳堤前三尺碑雪山來去重輕時
昔年蛙竈今牛

柵千戶機頭坐哺兒

三宿留仙觀題柱聯六句走草一絕以識之

青春重到降仙樓山色波光勝去秋
十二欄頭題大字朝霞飛入玉簾鉤

早發踰牛蹄嶺午炊于秦川之自作院

三月寒猶競千山氣不妍
早花初甲坼老樹尙拳攣
自是塞門近非關春令愆
農人能識節處處墾荒田
今行取路中山復峽棧路峻險崎
嶇入龍灣界始得平野

龜州連朔野重峽不容輪古壘花爲戍
荒村鹿與隣

間關行六郡征邁了三春乍入龍灣界山河物色新

觀獵威化島

四月初吉觀獵于威化島同諸守令渡鴨綠
江又渡蘭子江行二十里入島平野如盤周
可三十里武士騎步數千四面合圍妓女數
十乘馬馳突一府士民觀者以萬計余乃建
旗鼓隨其後所獲獐兔雉鴈之屬幾於盈車
云是近古所無大行賞賚煮肉饋酒仍觀劍
舞日暮罷歸

元戎春獵大江邊遲日平原景物妍萬馬風生芳草

裏百花香撲盡旌前揮戈格獸排朝霧伐鼓行魚漲
夕烟此地由來王跡起至今佳氣鬱葱然

白馬山城拜林將軍慶業影堂

將軍遺像掛層壇白馬城臨鴨水寒咫尺中原何世
界至今壯髮欲衝冠

聽流堂杜鵑滿山登天淵亭觀舞

一曲溪山近塞門臨流小閣好開樽花迎畫戟巖間
出風掣羅衫水底翻前輩風流詩滿壁華人題品墨
留痕石壁有第一溪山四字
傳稱朱天使之蕃筆廿年宦跡曾三到領得

春光又一番

向嘉山

三月行春四月還提封千里馬蹄間清川北注燕齊
海香嶽西連朔漠山鳴吠相聞皆沃野舟車交會摠
雄關百年休養王風遠花滿邊城戍鼓閒

冒雨向肅寧

安北城頭曉角吹長亭駟馬去透遲風搖細柳翻旗
脚雨打輕花點戟枝千里蒼生回衽席三春佳氣滿
檐帷山烽海戍俱無恙憑軾歸來好賦詩

暮抵安定道吟

黃梅小雨長溪痕風颭行旌濕不翻立馬官橋山欲

暝鷄聲遙在百花村

還平壤

西關形勝冠東寰星絡遙分斗尾間猛將英風清薩
水神人異跡妙香山三分虎踞曾何世百畝龜疇尙
可攀 聖化卽今超邁古人烟千里接龍灣

鄭甥東榦登科唱名 上特賜內部童樂俾榮

到涓上設宴志喜

仙童連袂動清笳黃甲恩榮侈故家魚鳥驚聽天上
樂江山交映月中花高樓舞劍回斜日綠水揚帆散
晚霞滿席衣冠歌 聖渥側身千里望京華

奮武臺落成讌詩

并序

上以西邊用武之地狃於昇平武力不競命藩臣
大閱鞞韋之士平壤安州二百里之內咸聚兩營
其餘遠邑各設都會定試官取各技具啓以聞入
格者閒良則特賜及第已出身者陞一資優等者
除職摠百餘人一路鼓舞莫不思衛國敵愾之義
洵曠世之盛舉也于時奮武臺新構落成適與下
旨之日相符夫豈偶然哉於是檄召屬邑入格武
士大酺于奮武臺列邑都會亦如之以五月六日
卜吉會者守宰十餘員文武前銜官三十餘人張

樂設戲酒數行羣武士皆叩頭起舞以頌 聖恩
乃題七言詩以志喜諸守令和之

嶽岫高臺列盡千龍蛇金鼓擁層欄地形削立千尋
壁眼界平臨百里山永日渾忘旗影倒炎風却避劍
光寒歡聲雷動恩如海和氣洋洋滿玉關

石湖亭

亭在大同普通兩江合流入海之處平湖滉
漾不辨涯涘遠山朝拱明麗如畫石峰斗入
水中頂起畫閣通豁廣爽殆是洞庭君山之
亞練光浮碧當讓一頭

大江西赴壑奇石屹波中積水兼天白斜陽倒海紅
魚龍收暗浪歌舞倚晴空盡日停歸棹秋懷渺不窮

萬景臺

臺在平壤西南二十五里東西江合流處岸
上突起高阜頂平如盤可建樓臺前臨三江
彎回島嶼交錯通望殆近百里遠山環抱峰
巒奇秀更勝於石湖可謂國中無對

百川東注沮江濱江勢彎回巴字文地劃三條西入
海天低萬宙上橫雲重重帆檝來無盡漠漠汀洲杳
不分黃鶴岳陽應伯仲東韓千里更誰羣

發巡渡江東南江向三登

行旆逶迤瀝遠灣清秋物色迥開顏一年重渡江東
水千里將窮塞北山滿野禾麻收次第迎車父老競
追攀遙看萬樹斜陽裏黃鶴高樓隱現間

留題黃鶴樓

往歲戊寅余以江東宰兼任三登遊黃鶴樓
去年辛亥秋以巡節來宿今秋又到謫仙詩
三登黃鶴樓千載相符留題以識之

明沙翠壁映芳洲月色江聲勝去秋黃鶴樓中三宿
去白雲紅葉擁歸翰

留成都試儒武乘月泛舟泝流江

月下維舟橋上行羅衣前導玉簫橫仙樓影倒星河
動十二欄頭盡燭明

夜宿留仙觀枕上聞簫聲自遠而來不覺起坐
開戶視之月色滿江未知聲之起處遂呼燭而

題

仙樓夜讌抵晨鐘醉倚匡床睡未濃一聲玉笛來何
處不辨巫山第幾峰

殷山澹澹亭和李東岳壁上詩語

壁上有東岳一絕句云高樓俯壓亂山巔縹

緲朱簾捲半天長笛一聲人不寐五更寒月

滿前川讀之不覺爽然當讓鶴樓一頭遂用

其語以續之

高樓百尺立秋風醉後豪吟有岳翁滿目溪山人不
見五更寒月掛層空

發北巡向安州

清北清南路始分長亭遠戍泝無垠邊山隱見如旗
脚野水縱橫錯繡紋畫角聲中霜欲墮檐帷影裏日
將曛雄城百雉臨江聳弩矢前驅有將軍

節度使柳令

孝源

新構小亭於運籌軒之東請

余書望海亭以揭之遂題一律

檠戟西臨細柳營
轅門東角倚彫楹
長江拖白遙連海
疊岫縈青盡向城
一席杯樽談節制
三軍笳鼓奏升平
巡邊此去猶千里
北望翻生出塞情

發寧邊

秦地峭關晉太原
東韓於此壯邊垣
羣峰劔束千家郭
一路弦開萬弩門
豎子弄兵曾電滅
健兒荷戟自雲屯
西來虎節今三到
每上高樓飲大樽

道遇雷雨宿標興
館早發入山楓色
正酣不早不
晚夜來風雨似有助矣

三十年前入妙香
重來峰壑摠迷茫
芙蓉萬朶猶真面
何處粧成錦步障

入香山舍普賢寺觀音殿奉玩西山大師袈裟寶珠及天朝諸將筆蹟有感而題

西山衣鉢此山藏
草樹葱籠聞妙香
法器遠從三佛國
浮圖猶放白毫光
風塵仗義慈心動
雲水歸真慧韻長
况有天朝諸將筆
輝煌寶墨鎮東方

登上院觀三瀑

蘭若峒嶢絕世勢
層巖斷壑路難分
飛湍忽自天中落
空響時從地底聞
灑向峰頭織作雨
磨來石面皚

耳溪集 卷一
如雲香山十勝皆仙境三瀑由來迥不羣

自上院又轉而東百折千回到內院萬峰環擁
奇巖競秀始得一山全面

金莖玉朶切雲間積翠連空不可攀滄海五更先見
日朔方千里更無山神人降嶽開王業老釋提戈救
世艱元氣儲停成福地長留寶筏度塵寰

引虎石

在上院菴前
攀鐵索乃上

斷壁層崖步步危重懸鐵索半空垂登高始識塵寰
小涉險方窺造化奇石老神翁馴虎處臺傳仙客叱
羊時上方一宿諸緣息流水閒雲入夢詩

冒雨出山渡月林江

入山雨捲出山雨衡嶽開雲事更稀月林江上停歸
棹法雨仙香渾濕衣

發龜城踰大小青龍嶺

西下龜州複嶺重中分朔野兩青龍山頭日射紅千
樹海上雲開碧數峰地狹馬陵多曲折門通鴈塞卽
要衝邊臣幸值升平久閒坐琴軒眺遠烽

納清亭

臨水名亭號納清新安一半接嘉平村容左右魚鱗
比山勢高低鶴翅橫自是力田饒黍稻由來傳世盛

王溪集 卷一
簪纓關西獨擅文明氣童子皆能誦五經

夜宿運籌軒次壁上諸公韻留贈柳節度

九世山西十統軍黑頭才畧禁廬聞百年部曲傳衣鉢
萬隊貔貅擁戟門永夜柝聲連鴈塞清秋劍氣射燕雲
撫綏將士真長策盛代何須汗馬勲

旬日自順安還營

九月霜清畫角催黃花處處向陽開身同候鴈南仍
北路似循環往却回千里牛羊初放野萬家禾黍各
成堆近聞邊吏新巡海獐島漁船不復來

向晚登鏡波樓

便輿扶上鏡波樓斜日疎簾掛半鉤烟樹熹微移墨
畫漁舟散落似眠鷗龍山秀色當簷聳羊島浮光入
檻流更愛綠池開一面萬家城市獨清幽

浮碧樓

雲際危欄倒水濱天孫何日洗麒麟島分楚峽猶興
雨巖吐秦泉解醉人應是化翁偏逞巧誰將妙筆擬
傳神長留乙密山頭月流照滄波閱劫塵

燕雲續詠

甲寅冬以冬至兼謝恩正使赴燕李叅判義弼爲副使沈學士興永爲書狀官

至月初七到箕城宿練光亭

星輶重到涓江濱遠樹長亭入眼新關塞二年觀察

使燕雲萬里上行人棠陰未改迎牛酒芻騎成羣擁

駟輪按道時買立諸將官戰馬以習芻射三宿練光

明發去前期留待百花春

辛亥清北告飢壬子春余以巡節監賑今到郭

山雲興館耄倪成羣遮道致謝宣川以下亦然

故賦以志之

行到雲興暫駐車盈街父老語欷歔往時萬命將溝

壑此土三年復未勦敢道旬宣留召化只寬宵旰念

周餘沿江一帶爭來迓千里旌旄為爾徐

聽流堂

溪堂粉壁舊題名巡節還將使節行滿岸霜林留錦
色通宵石溜作琴聲佳人解唱陽關曲寒月偏添玉
塞情却笑鬢毛如雪白十三年後再西征

入龍灣

六度重看塞月圓樓臺樹木摠依然星羅戍壘黃雲
外劔立遙山落照邊薊北含綸逾十載關西仗節僅
三年江頭老堠應相笑王事胡為子獨賢

士民持壺酒處處迎拜安有遺惠可見厚俗

龍灣士女爛如雲牛酒來迎舊使君十里街亭連供
帳兩行鬢白各成羣撫摩却愧行何德風俗猶傳古

耳溪集 卷一
所云更喜邊門王化盛萬家鳴吠自相聞

渡鴨江夕抵九連城露宿憶鎮江古蹟

鴨綠水名古馬訾中州玉帛自羅麗三江劃地分夷
夏兩國連疆入尾箕何事山川皆北向每年冠蓋尙
西馳鎮江城郭尋無處寥落行人露宿時

夜宿葱秀山下

葱秀山前夕照明厨人張幄候停行清泉尙憶曾煎
茗老樹猶餘舊掛旌逾旅本知非我土重來聊復作
人情中宵跋燭寒無寐直待明朝抵木城

午炊鳳城宿松站

冰雪凌兢馬不驕關山迢遞轉星軺陸生萬里重遊
越富老三年再聘遼薄海卽今歸約束行人只合採
風謠鳳城內外皆窮塞終日鑾鈴各自招

自黃家庄向通遠堡

連天一路浩漫漫禹貢全圖馬上看列宿半懸南極
下百蠻遙寄小瀛端文章豈有江山助眼目頗隨宇
宙寬十載重來無箇事白頭閒弄掌中丸

入境三日記所見聞 二首

百年休養驗昇平萬國梯航拱上京交廣名香來柵
市天津垂柳接邊城牛羊滿谷行成隊鷄犬歸棲宿

不驚覘國由來先視野里閭無聞索租聲

萬里車書拓四封窮瀛絕漠盡朝宗耕夫不見牛穿

鼻月令新頒塵出茸

穿牛鼻絡馬首肇自易繫而清人則不穿牛鼻而只絡其首驅

使如意月令云十一月麋角解而乾隆某年遣臣後苑驗視則麋不解角而塵角乃解故遂改月令頒於

皇曆兩事俱前史所未有也

王會職方猶未悉獸蹄鳥舌亦相逢

琉球近日浮青海貢使新添九譯重

琉球人今年漂到我境願由陸

還國故貢使具咨文領付瀋陽

度會寧青石兩嶺宿娘子山

連山關下雪花橫青石嶺頭倦馬鳴家國蒼茫千里
遠天時荏苒一陽生貂裘欲弊寒逾重蠟燭將堆夢

不成更惟聽官都已廢窓前猶喜聞鷄聲

登石門嶺望遼野

石門中坼抗層巒千里蒼茫積氣蟠北極高低天半
見東溟遠近日邊看寰區始識中華大客子渾忘行
路難去國數旬山海隔白雲何處是三韓

觀白塔宿迎水寺

崢嶸古塔入青冥華表仙人是姓丁漢帝金莖承雨
露伏波銅柱鎮滄溟十年遼郭重來鶴萬里箕躔老
客星往事迷茫無處問漫傳唐將勒功銘

或稱尉遲敬德紀功

早發向爛泥堡始入大野

關東千里是全遼野色迷茫似遠濤天地相撐星象
近山河如掌日輪高來牛去馬行無盡憑軾揚鞭氣
自豪強欲放歌心力短蕭疎白髮不勝搔

午炊白塔堡冰渡渾河

梵宇連商店紅欄繞畫亭浮雲生大陸白日轉青冥
塵漲千家樹風鳴萬馬鈴遼陽七百里行邁幾時停

向瀋陽

天運人謀各一時瀋陽肇朔帝王基指揮諸夏提三
尺鞭撻羣雄用八旗志士於今空自老騷人到此遂
無詩華兒莫問東韓使白首重來長鬢絲

曉發高家子過周流河轉向新民屯

逶迤征旆向青冥明滅行燈似曉星百里熹微高下
樹千村散落短長亭巨河尚記春冰渡

壬寅歸路到巨流河流漸塞津留三日始渡新堞翻教卯酒醒

周流河是驛村而時無城堞今見甃築儼成關防何處銅絃彈數闋繁音嘈切不堪聽

過白旗堡始入遼西猶是箕子舊境

遼州本是古句麗折入中原亦一時武帝雄圖開濊
貊慕容王跡起鮮卑潮通吳楚三千里雲散隋唐百
萬師歎息箕封何處覓水田猶有舊耕菑

午炊中安堡

飛沙撲雪氣凌兢白髮胡然再飲冰前代益齋逾劔閣皇朝圃老貢金陵百年許國身何有諸夏觀風我未能回首東溟猶在目搏桑喜看日初昇

早發閭陽驛遼野將盡巫閭漸近

星軒七日御冷風衣袖翩翩滂碧空飛鳥沉浮雲影外行人來去日輪中天低羲仲賓應近野曠夸夫步不窮廿八瑤躔今幾度此身已出斗杓東

宿十三山

十三年前六十翁十三山下再觀風天星倏已過一周流光又是臘月中當時我髮未全白今日皜如山

雪同明年歸時春正闌應見山花滿山紅亭亭山色長如舊閱盡人間幾英雄遼陽若見重來鶴爲道行人姓是洪

渡大凌河望醫巫閭

巫閭遠勢接天來北口長風動地迴秦帝揮鞭餘斷石唐宗捲甲有高臺山河萬里供雙眼王霸千年把一盃莫笑老夫霜髮短切雲頭上自崔嵬

過大小凌河抵宿高橋堡

積雪初消玉宇澄松山一點見微稜烟開日出蒼茫野風定沙明大小凌雲作奇峰還不見車如流水每

耳溪集 卷一
相承此中好展扶搖翼何處圖南有大鵬

午炊連山驛向寧遠城記遼左風俗

冀北行商盡用車遼東子弟耻騎驢撞金打鼓常巡
夜擊鞞磨肩競趨虛店肆沽多瀋陽酒盤飧供有錦
州魚邊民自古嫺馳射挾矢人皆不挾書

自沙河所向東關驛

全遼地錯古扶餘滿漢同袍不異閭近海皆爲平頂
屋搬柴多用獨輪車塵埃障日無飛鳥原隰隨陽好
放豬寧遠城邊百戰地居民但道力耕鋤

遼人善畜牧牛馬豬羊各順其性必有相傳之

法聊記其實以俟識者

海內車爲貨邊門盛圈藩牧兒通獸性老馬解人言
逐隊如相識磨痒寂不喧何年罷穿絡直欲問軒轅
曉發向中前所月色如晝天野一色亦一壯觀
河漢初傾夜未闌層氷路滑馬蹄班月光包盡無邊
野雲際藏深何處山雙旆搖搖行露濕孤燈耿耿曉
星殘明朝正好東觀日薄暮終當西入關

歷登吳王臺望姜女廟憩二里店會副使書狀

小飲

榆關城外客徘徊一曲高歌意未裁青海無邊姜女

石長風不斷吳王臺眼前物色曾三宿老去曾襟得
再開漠漠東天飛鳥盡夕陽回首且含盃

暮入山海關宿紅花店

王氣初浮黑水湄瑤躔忽見帝星移橐駝一日馳千
里貔虎三軍視八旗山海關中掉臂入武英殿下叩
頭時天心已許輸全局國手難容一着碁

途中望見撫寧昌黎諸山文明之氣真是中華
世界詩以賦之

包山絡野壯藩垣天限華夷此一門海內無如冀州
大域中方識帝鄉尊文峰日暎昌黎縣岱嶽雲深闕

里村風氣由來隨地變長城內外異寒暄

榆關秀才齊佩蓮曾於壬寅相識今來迎候店
舍把酒敘阻卽席獻詩和以書贈

行旆悠揚萬里風天涯明月一樽同十年不見黃崖
子半夜相看白髮翁我似老蹄猶識路君將豪翮可
搏空眉間尚有青霞氣期振芳名聞海東

自撫寧縣抵宿永平府

燕中形勝何雄哉高壓神州萬里開碣石東臨滄海
立黃河西決太行來風檣遠泛江淮粟雲棟皆輸晉
楚材莫說地方隣北塞山河鍾得幾英才

向沙河驛路傍多大樹漫吟

百年中國報昇平生老鄉廬不見兵路畔樹多連抱
壽里中人少弊衣行始知漢法元從簡方信天心在
好生天下本來無箇事至今君子恨熙寧

過昌黎縣右北平緬懷古人自起羈愁

斜日西風倦鳥飛沙河古渡行人稀將軍射虎石猶
在吏部騎龍雲不歸但見夕烟迷遠樹不知山露濕
征衣車前忽看村閭近榆柳疎林暎落暉

暮抵豐潤登文昌閣層臺干雲曠野如月飄然
有羽化之思

中天帝子降奎壁影飄颻據榻雙星侍開簾衆岳朝
人間傳彩筆雲外喚仙簫捧袂丹梯上身如狂九霄
到高麗堡招問父老無人識古事者悵然而題
車蓋曾經十載前藩籬阡陌尚依然篝燈女織扶桑
繭野水牛耕樂浪田秦漢衣冠今幾代朱陳嫁娶不
知年村人莫恨山河隔紅日箕躔共一天

道薊州望見漁陽橋抵宿邦均店

輪車行不息駟路渺無垠再涉山千里重看月半輪
歸禽爭薊樹征馬拂遼塵聞說漁陽近棲棲愧問津
薊門烟樹

千里王畿自鬱葱蒸成活畫薊門東水流元氣無形
外人在青天倒影中每見烟波方瀕洞欲尋聲臭竟
虛空重來十載渾依舊誰識乾坤造化工

早發遇雪渡江一月始見尺雪燕山如席之花
儘非虛語午炊棗林庄向燕郊

竹葉猶能禦渴饑貂裘那可辟寒威燕山飛雪大如
席薊野纖塵暗入衣未向東溟看旭日長愁西嶺趁
斜暉村翁薄暮能延客明燭燒香不掩扉

燕郊途中

天設神都四代仍龍飛鳳舞氣騫騰漁陽突騎健如

虎冀北名駒豪似鷹天下精兵無與敵古來英傑此
中興昭王擁篲成何事磨室唯聞寶鼎登

終日大雪千里一色亦是中州大觀

乾坤一色浩無端萬象俱空大界寬不夜瑤臺如有
影無風銀海自生瀾燕人始見烏頭白遼野應埋鶴
頂丹最喜田家占有歲春回耕麥不憂乾

午炊大王庄向朝陽門

九垓遂通道萬里有行人宇宙雲千劫山河月一輪
塵埃餘白髮意氣負青春海內今無事觀風屬老臣

歲除日曉皇帝行謁廟禮與進賀使

正使朴右
相宗岳副

使鄭參判大容書
狀鄭校理尚愚 祇迎于午門外叅宴于保和

殿後寢殿賜茶果張百戲是時荷蘭國越重溟
來獻寶器珍惟蓋於康熙十二年始來今於乾
隆六十年又來貢斯乃前牒所未有者也亦隨
東使叅宴冠服詭恠誠一異觀詩以識之

冀野星分近斗杓皇王定鼎自唐堯長城萬里連滄

海金闕九重抗碧霄日下容光皆徧照寰中寸地畢

來朝西溟又有荷蘭國百歲重來獻璧瑤

西洋屬國距中國
水陸九萬里云 荷蘭國在
西海中為

記中州僉俗

中州崇奉太多門風俗靡然莫識源佛宇多於尼聖
廟關公並與梵王尊人神雜糅肇何代金碧交輝不
辨村近世又聞天主教觀星測海競波奔

同進賀使與紫光閣宴皇帝命禮部侍郎引入

北海子乘雪馬遊太液池觀萬佛寺五龍亭登

永安寺白塔渡玉蝀橋罷歸

太液冰湖接御溝五龍天矯戲蓬邱清都眼遍三千

界白日身登十二樓華渚悅聞靈鵲叫昆池如見石

鯨浮明朝定報星官奏牛女中間有客遊

贈禮部尚書紀曉嵐句
句有日邊犯
我諱省之

乘槎往歲副行人執玉今朝大使臣跡似老駒能識
路身隨候鴈復來賓山川跋履三千里日月貞明六
十春宗伯聲名高北斗清風難和頌昌辰

禮部侍郎鐵保手寫一聯詩見贈詩以謝之

近讀涉江草

涉江草即鐵保游江淮詩卷

驚看倒海瀾南宮賓遠

國東閣抗詞壇玉帛登嘉會文章盡大觀輝光生一
顧筆下耀琅玕

上元夜同進賀副使鄭台道以

大容

游南海子

十七橋

太液池即北海子西山即南海子

海上虹浮十七橋乘槎偶到上元宵光添明月分高

下影接長河互動搖頗恠鐵牛牽不起

十七橋畔鑄置鐵牛設壇

綠垣上刻乾隆御製銘

應須天女下相招凌虛更看層樓聳何

處遊仙弄玉簫

白圓明園向西山渡十七橋登望蟾閣

星宿派分作奧區西山奇勝埒西湖長虹飲水生雲
雨飛閣連空掛畫圖日月高懸仙佛界烟花長擁帝
王都乘槎使者尋源到天上人間定有無

墨庄李翰林鼎元送示登岱圖一帖遂書泰山

高歌一篇以歸之

泰山高東海低祥雲遙擎日月輪元氣長浮乾坤倪

耳溪集 卷七
我居東海夢泰山巍巍如天不可階今年執玉上神
州路過遼陽近青齊青烟九點漫入矚白雲千丈何
由躋墨庄學士青雲客雅志名山辭金閨疋馬短筇
登絕頂大觀寰區一放睇歸來貌得尺絹上包盡千
巖與萬溪丰茸奇石膚寸舒攢蹙深壑咫尺迷謂我
遠途人求我數字題岱宗全面入几案淋漓筆下生
雲霓飄然坐我日觀峰髣髴耳邊聞天鷄七十二代
何杳茫秦碑漢封餘金泥千年石戴尼父屐何處雲
霧孫公棲自憐老夫腋下無羽翰安得振衣上丹梯
山巖巖兮水渺渺我向天東君住西泰山之歌何時

續惟有歸雲送馬蹄

進賀使先歸詩以送別

殊方經歲久相依南館西城會合稀賓鴈共飛千里
遠春風未作一行歸元宵火樹還如夢遼野緇塵尙
濕衣遙想鴨江水正渙何時聯袂拜彤闈

紀曉嵐宗伯以清白文章冠冕一世實有知音
之感出都門聊賦惓惓之意 二首

東國書生好大談奇材何處見樟枏中州人物稱淵
海稀世文章有曉嵐知己難逢天下一大觀方盡域
中三行行萬里頻回首魂夢應懸北斗南

河間生傑富文章博雅儒林擅大方足躡河源二萬

里手繙天祿三千箱紀公是河間人嘗奉命往尋河源方帶文淵閣直學士編校四

庫全書百年隻眼明如鏡諸子迷津涉有航白首相逢

寧偶爾一言契合示周行

滯三河縣示副三价求和

冰霜萬里八旬翁行色飄飄似轉蓬鶴髮逢春增感

慨狐裘經歲更蒙戎車前喜看雲生海馬首長隨日

出東薊樹遼山猶隔眼扶搖安得借天風

步書狀韻

老年王事不遑寧十載燕山再旅庭幾日同携仙佛

界浮槎如犯斗牛星薊門樹蘸無聲畫海岱烟開未
了青學士曾襟應博大何如白首坐窮經

發玉田向豐潤

玉田東下路漫漫地近遼陽眼更寬車載日輪行萬

里人隨春色向三韓薄烟籠樹平如海古渡藏舟不

動瀾此去榆關無幾日巫閭天畔露噴峴

贈孤竹居士李美

海左行人洪漢師關西豪士李純之山連墨子清風

遠雲護文公大字奇孤竹祠三十里有夷齊讀書處韓文公大書于石面純之印送

于癸卯使行故云萬里精神犀一點十年顏髮雪千絲燈前

把酒還分手明月長懸兩地思

道見漢女扶杖短步聊識弊俗

千載中華有古程聲容步武盡緣情滿兒不作侏儻
語漢女胡為彳亍行踴屢曾聞齊市貴弓鞋或襲漢
宮名聖王有起應丕變陋俗何論習與成

自沙河驛向永平府

楊柳依依芳草生風旌獵獵向長城秦船不到東瀛
海漢節初回右北平社樹欲青春燕返墟烟漸白午
鷄鳴農人似識犁星見處處陽坡破雪耕

追記燕京見聞

燕雲天子是何官服食輿乘摠異觀象齒十斤如拄

笏駝峰兩岸自成鞍西藏已獻珍苾碧南舶常供寶

石丹珍苾出哈密禹貢山河猶短幅梯航九萬又荷

蘭

道見小驢繫車後長鞭打馬尾經傳所載信而

有徵聊記所見以牖東俗

詩書文字自中州四海同源却異流車在馬前傳禮
記鞭長腹遠見春秋少時口讀如齊語今日身經破
楚咻萬事不宜看滅裂觀風從古貴諮諏

遠遊記懷

中華自是大門閭海外偏區等闔廬少日曾懷四方
志遠遊勝讀十年書東方三月文猶足屈子九州覽
有餘赤縣山河今再涉須看元氣尚扶輿

撫寧古多名宦石樓金榜照耀城內又聞猿狙
產於山中荆蜀風氣獨見於此自遼至燕絕無
松栢而永平以下百餘里往往成林可見地靈
殊異也詩以識之

關內名州是永平兩京控引一雄城簪纓都會撫寧
縣物貨繁華大理營松栢獨青遼九郡猿狙時弄蜀
三聲山川信美多靈氣平楚東臨海色明

澄海樓觀日出 二首

南北西溟盡附庸百川於此獨朝宗日輪升降無量
海天柱高低未辨峰氣暖三春蒸雨露風鳴萬壑變
魚龍乘槎便欲窮源去蓬島烟霞路幾重
曉色初分霧氣濃天邊忽見日高春鯤鵬水擊三千
里海岱雲迷七十封夸父虛勞窮地軸少翁何處覓
仙蹤東韓自是扶桑國幾度身登日觀峰

出山海關宿兩水河

夷夏封疆此地分四方車馬走紛紛秦關百二人如
霧燕路三千樹入雲北帶巫閭包不盡東環渤海漭

耳溪集 卷七
無垠山河表裏元天限羸氏窮兵漫自焚

發向寧遠衛近海多風竟日掩轎窓而行

曲尺橋前水自波烟臺河外柳絲斜春光澹蕩雲如
樹海氣冥濛風有花古渡冰消頻沒馬斷崖泥滑欲
翻車飛塵滿目行人少何處城頭起暮笳

大風終日留滯寧遠城底有感而作

殊方經歲閱光陰歷覽山河感古今白日每看生碧
海丹砂未見化黃金鶴歸華表留清響仙過岳陽有
朗吟寧遠城頭歌一曲夕陽疎柳聽啼禽

自寧遠向高橋堡

燕關已杳邈遼野更逶迤地坼山河大天長日月遲
海風吹不斷春色遠相隨鴨水猶千里終當有到時

午炊松山抵雙陽店

千里全遼盡白墳天邊時復見浮雲北辰轉似車中
軸九土森如掌上紋野濶不分山遠近春深始覺氣
氤氳行行半日無亭堠猶喜鷄聲隔水聞

發雙陽店渡大凌河此地與松山堡俱是明師

大衄之處海中覺花鳥鐵山嘴卽航海朝天之

路舉目山河自然興感

近海悲風多行人一放歌潮生鐵山嘴橋斷大凌河

王溪集 卷一
戰地餘青燐朝天有白波松山已寥落花鳥復如何
過十三山宿閭陽驛

百蟄已將草甲坼千林欲放柳絲黃春寒未退烟光
薄午晷初移樹影長默數前程猶隔月平看東海似
還鄉松山以外車還北雲際蒼茫是瀋陽

轉向北鎮廟縱觀醫巫閭全面書贈守僧廣老
和尚

天作高山鎮北東層峰崒岬插晴空扶桑遠掛朦朧
影渤海長嘯廣漠風齊楚蒼茫游氣外雲烟變化太
虛中三韓使者乘槎到目送飛鴻意不窮

中安堡途中

二月將闌日影遲行行大野苦支離巫閭千里長如
故滄海三旬近若隨舉目山川知不遠經年消息問
憑誰鴨江春色應猶早每日溪邊驗柳枝

記遼薊女俗

燕趙佳人自古聞幽并兒女早成婚花簪髻聳時窺
客絲履手縫不出村敢擬梁妻高舉案猶慚夔婦健
持門鏡中不省春容改脂粉縱橫坐抱孫

渡羊腸河冒大風宿小黑山

車聲軋馬蹄忙野色荒荒駟路長村落繇聯如鴈

陣河流屈曲似羊腸風生特地驚沙舞霧暗遙空去
鳥狂惟有道傍千樹柳纖條裊裊弄春光

發高家子午炊大方身

萬里東歸日千山北盡時車聲遵海遠春色過江遲
風靜村烟直雲行柳影移箕封看漸近憑軾好吟詩

瀋陽

雲飛黑水降神人風拂紅旗掃八垠天子不知何姓
氏地方未有自生民祖孫二代百餘歲臣僕萬邦六
十春叔季繁文天所厭養成元氣返淳真

白塔堡

筆路開基制作牢瀋河表裏壯城壕千山盡處滄溟
遠萬樹中間一塔高駿馬摠肥春苜蓿健兒多醉碧
葡萄宏規不見興王地後世誰知勦業勞

爛泥堡途吟

境到神來自不禁非求弊帚享千金詩如浩氣元充
塞人得天機有淺深河北山川司馬史劒南花鳥杜
陵吟燕雲薊樹閒來往萬象牢籠只寸心

午抵冷井龍灣吏持家書來待詩以志喜

撩亂羈愁不自禁登山臨水摠關心途中忽遇龍灣
使雲外如聞鴈足音萬里殊方徂二歲一封短牘抵

千金太平家國今無事好向東風一放吟

躡青石會寧兩嶺

關東八站抱重岡青石摩天一路長却喜山容如我
國不知春色是他鄉雪消鴨水應添綠天遠燕雲更
變蒼松下老僧迎舊客手撞銅鉢勸茶湯

春分日天氣晴朗我境似同然喜而賦之

春光冉冉寒猶驕佳氣依依暖遠霄山火多從深谷
起溪冰不待暖風消人間晝夜初分劑天上雲烟自
動搖更喜鳳城纔隔日况聞鴨水已生潮

過鳳凰山向柵門

長白西來氣勢長前臨鴨水更騰驤雲間彩鳳翔千
仞霧裏青蓮吐萬房如此江山何寂寞至今華夏視
邊荒猶聞安市傳奇蹟一片孤城抗大唐

小望到浪上宿練光亭

去年雪裏過西州經歲東還續舊遊萬里幽燕初返
節三春清浪更登樓萋萋遠岸烟生樹灑灑澄波日
暎洲舞女歌兒都罷遣玉簫前導向船頭

宿黃岡齊安堂觀劍舞

二月韶光變柳條飄然歸旆自燕遼十年五見黃岡
月千載重聽赤壁簫流水聲隨歌響轉飛星影拂劍

光搖壺觴更就竹樓飲一炷清香百慮消

耳溪集卷七 終



